

BOSNA I HERCEGOVINA

Brčko distrikt BiH

СКУПШТИНА

БРЧКО ДИСТРИКТА БИХ



БОСНА И ХЕРЦЕГОВИНА

Брчко дистрикт БиХ

СКУПШТИНА

БРЧКО ДИСТРИКТА БИХ

10.8.

07.612

Младена Маглова 2, 76100 Брчко дистрикт БиХ, телефон и факс: 049/215-516

Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), člana 3 Zakona o javnim preduzećima u Brčko distriktu BiH (Službeni glasnik Brčko distrikta BiH, brojevi: 15/06, 5/07, 19/07, 1/08 i 24/08), člana 64 Poslovnika o radu Skupštine Brčko distrikta BiH (Službeni glasnik Brčko distrikta BiH, brojevi 17/08 i 20/10) i Prijedloga odluke Vlade Brčko distrikta BiH, broj: 02-000434/12 od 8. 8. 2012. godine, Skupština Brčko distrikta BiH, na 71. redovnoj sjednici održanoj 8. augusta 2012. godine, donosi

ODLUKU

O OSNIVANJU JAVNOG PREDUZEĆA „PUTEVI BRČKO“ D.O.O. BRČKO DISTRIKT BiH

DIO PRVI – OSNOVNE ODREDBE

Član 1 (Predmet)

Ovom odlukom osniva se Javno preduzeće „Putevi Brčko“ d.o.o. Brčko distrikt BiH (u daljnjem tekstu: Preduzeće).

Član 2 (Osnivanje Preduzeća)

- (1) Osnivač Preduzeća je Brčko distrikt Bosne i Hercegovine (u daljnjem tekstu: Distrikt).
- (2) Preduzeće se osniva s ciljem upravljanja putnom infrastrukturom na području Brčko distrikta Bosne i Hercegovine.

Član 3 (Status Preduzeća)

Preduzeće je pravno lice koje obavlja djelatnosti od općeg interesa u skladu sa Zakonom o javnim preduzećima u Brčko distriktu Bosne i Hercegovine (Službeni glasnik Brčko distrikta BiH, brojevi: 15/06, 5/07, 19/07, 1/08 i 24/08 – u daljnjem tekstu: Zakon o javnim preduzećima).

DIO DRUGI – ORGANI I RAD PREDUZEĆA

POGLAVLJE I. NAZIV PREDUZEĆA

Član 4 (Naziv i sjedište)

- (1) Preduzeće posluje pod nazivom: Javno preduzeće „Putevi Brčko“ d.o.o. Brčko distrikt BiH.



(2) Skraćeni naziv Preduzeća glasi: JP „Putevi Brčko“ d.o.o. Brčko distrikt BiH.

(3) Sjedište Preduzeća je u Brčkom, ulica Bosne srebrene br. 12.


Član 5 (Pečat i štambilj)

- (1) Preduzeće ima pečat oblika kruga u kojem je koncentričnim krugovima ispisan, latiničnim i ćirilničnim pismom, puni naziv Preduzeća.
- (2) Preduzeće ima štambilj oblika četverougla koji sadrži puni naziv Preduzeća, a služi za ovjeru prijema akata.
- (3) U slučaju izrade više pečata i štambilja iste veličine, pečati i štambilji moraju biti istovjetni po sadržaju i svaki označen arapskim brojem.
- (4) Veličina pečata i štambilja, način upotrebe, čuvanje i broj pečata i štambilja uređuje se posebnim aktom, koji donosi direktor Preduzeća.

POGLAVLJE II. DJELATNOST PREDUZEĆA

Član 6 (Djelatnosti od općeg interesa)

- (1) U okviru djelatnosti od općeg interesa Preduzeće:
 - a) upravlja i rukovodi javnim putevima, putnim objektima i svim drugim dobrima povezanim sa njima;
 - b) upravlja i nadgleda izgradnju, rekonstrukciju, održavanje i zaštitu putne infrastrukture;
 - c) održava zelene površine u putnom pojasu;
 - d) obavlja poslove tehničke regulacije saobraćaja na javnim putevima;
 - e) upravlja javnim parking površinama;
 - f) definiše, za period od tri godine, razvojnu strategiju, investicioni plan i poslovni plan, koji se kontinuirano ažurira;
 - g) ažurira svake godine trogodišnji poslovni plan u pogledu ciljeva plana;
 - h) podnosi gradonačelniku prijedlog godišnjeg budžeta, na osnovu razvojne strategije, investicionog plana i poslovnog plana;
 - i) provodi postupak javne nabavke za sve radove i usluge u skladu s važećim zakonom, a s ciljem vršenja djelatnosti od općeg interesa utvrđene ovom odlukom;
 - j) obavlja druge djelatnosti i poslove u skladu sa Zakonom o putevima Brčko distrikta BiH, kao i u skladu s drugim zakonima i propisima.
- (2) U skladu sa Zakonom o klasifikaciji djelatnosti Brčko distrikta BiH (Službeni glasnik Brčko distrikta BiH, brojevi: 8/07 i 59/10) i Odlukom o klasifikaciji djelatnosti Brčko distrikta BiH (Službeni glasnik Brčko distrikta BiH, broj 1/11), Preduzeće obavlja djelatnosti i to:
 - a) 42.11 – gradnja puteva i autoputeva;
 - b) 42.13 – gradnja mostova i tunela;
 - c) 42.99 – gradnja ostalih građevina niskogradnje;
 - d) 43.12 – pripremni radovi na gradilištu;
 - e) 43.21 – elektroinstalacijski radovi;

- 
- f) 43.34 – bojenje i staklarski radovi - građevine niskogradnje;
 - g) 52.21 – uslužne djelatnosti u vezi s kopnenim prevozom;
 - h) 71.12 – inženjerske djelatnosti i s njima povezano tehničko savjetovanje;
 - i) 73.11 – agencije za promociju;
 - j) 81.29 – ostale djelatnosti čišćenja;
 - k) 81.30 – uslužne djelatnosti uređenja i održavanja zelenih površina.

Član 7 (Ostale djelatnosti Preduzeća)

- (1) Pored djelatnosti iz člana 6 ove odluke, Preduzeće može obavljati i druge djelatnosti koje služe registrovanim djelatnostima i to djelatnosti razvoja, projektovanja, izgradnje i održavanja putne infrastrukture i objekata; informativnu i naučnoistraživačku djelatnost u oblasti putne infrastrukture; djelatnost geodetskih, geoloških, geotehničkih i hidroloških istraživanja i druge djelatnosti, koje su u funkciji vršenja registrovanih djelatnosti, a koje su utvrđene statutom Preduzeća.
- (2) Preduzeće može obavljati i djelatnosti koje nisu upisane u sudski registar, a koje služe registrovanim djelatnostima pod uslovima propisanim zakonom.

Član 8 (Promjena naziva, sjedišta i djelatnosti)

O promjeni naziva, sjedišta i djelatnosti Preduzeća odlučuje posebnim aktom Upravni odbor Preduzeća, uz saglasnost Skupštine Distrikta.

POGLAVLJE III. OSNIVAČKI KAPITAL

Član 9 (Osnivački kapital Preduzeća)

- (1) Osnivački kapital Preduzeća u iznosu od 2.000,00 KM uplaćuje se na poseban račun otvoren kod banke, prije upisa osnivanja Preduzeća u sudski registar.
- (2) Troškove osnivanja Preduzeća snosi Distrikt.

Član 10 (Povećanje i smanjenje kapitala)

- (1) Osnovni kapital Preduzeća može se povećavati ili smanjivati.
- (2) Smanjenje osnovnog kapitala Preduzeća ne može se vršiti ispod iznosa minimalnog osnivačkog kapitala koji je određen zakonom.

Član 11 (Povećanje kapitala iz obaveznih rezervi)

Povećanje osnovnog kapitala Preduzeća može se vršiti iz obaveznih rezervi Preduzeća, ukoliko Preduzeće za posljednju poslovnu godinu nema nepokrivenih gubitaka.

POGLAVLJE IV. INFRASTRUKTURA



Član 12 (Infrastruktura od općeg interesa)

- (1) Infrastrukturu od općeg interesa, koja se daje Preduzeću na upravljanje, čine svi javni putevi i to: magistralni, regionalni, lokalni, nekategorisani putevi i ulice u naseljima te sva dobra povezana sa njima, kao i površine za mirujući saobraćaj na području Distrikta.
- (2) Infrastruktura od općeg interesa iz stava 1 ovog člana je u vlasništvu Distrikta.
- (3) Preduzeće je ovlašteno i dužno da razvija, upravlja, koristi i održava infrastrukturu od općeg interesa u stanju koje omogućava nesmetano obavljanje djelatnosti od općeg interesa koje su mu povjerene, kao i da održava ispravnost i funkcionalnost objekata koji čine sastavni dio te infrastrukture.
- (4) Troškove upravljanja i održavanja infrastrukture od općeg interesa snosi Preduzeće, u skladu s poslovnim planom Preduzeća.
- (5) U roku od 90 dana od dana stupanja na snagu ove odluke, gradonačelnik će svojom odlukom utvrditi koja se infrastruktura od općeg interesa, kao i druga imovina, daje Preduzeću na upravljanje i korištenje s ciljem obavljanja svojih djelatnosti.

POGLAVLJE V. RADNO-PRAVNI STATUS

Član 13 (Preuzimanje zaposlenih)

Preduzeće preuzima zaposlenike Distrikta koji su raspoređeni na radna mjesta u Odjeljenju za javne poslove – Pododjeljenje za puteve i parkove, u skladu s odlukom koju donosi gradonačelnik Distrikta u roku 60 dana od dana upisa osnivanja Preduzeća u sudski registar.

Član 14 (Unutrašnja organizacija i sistematizacija radnih mjesta)

Unutrašnja organizacija Preduzeća, sistematizacija radnih mjesta i opis poslova i zadataka uređuju se posebnim aktom o unutrašnjoj organizaciji Preduzeća, koji donosi nadležni organ Preduzeća, uz saglasnost osnivača.

POGLAVLJE VI. ORGAN UPRAVLJANJA

Član 15 (Organ upravljanja)

- (1) Preduzećem upravlja Upravni odbor.
- (2) Upravni odbor ima nadležnosti i dužnosti koje su propisane Zakonom o javnim preduzećima.

- (3) Bliže odredbe o nadležnostima Upravnog odbora uređuju se statutom, a rad Upravnog odbora uređuje se poslovníkom o radu Upravnog odbora Preduzeća.

Član 16 (Sastav Upravnog odbora)

Upravni odbor se sastoji od pet članova i to:

- a) dva člana koji mogu biti iz reda službenika zaposlenih u organima javne uprave Brčko distrikta BiH, a koji posjeduju visoku stručnu spremu, ekonomskog, pravnog ili tehničkog smjera;
- b) ostali članovi koji nisu zaposleni u organima javne uprave, a koji posjeduju visoku stručnu spremu, ekonomskog, pravnog ili tehničkog smjera.

Član 17 (Imenovanje Upravnog odbora)

- (1) Gradonačelnik Distrikta imenuje članove Upravnog odbora u skladu sa Zakonom o javnim preduzećima.
- (2) Upravni odbor se imenuje na period od četiri godine, uz mogućnost ponovnog imenovanja, u skladu sa Zakonom o javnim preduzećima.
- (3) Upravni odbor se imenuje u roku od 90 dana od dana stupanja na snagu ove odluke.


Član 18 (Kvorum i glasanje)

- (1) Upravni odbor može odlučivati ako sjednici prisustvuje više od polovine ukupnog broja članova Upravnog odbora, a svoje odluke donosi većinom glasova ukupnog broja članova.
- (2) Odluke Upravnog odbora potpisuje predsjednik, a objavljuju se na način određen statutom Preduzeća.

POGLAVLJE VII. ORGAN RUKOVOĐENJA

Član 19 (Direktor)

- (1) Preduzećem rukovodi, predstavlja ga i zastupa direktor Preduzeća (u daljnjem tekstu: direktor).
- (2) Direktora imenuje Upravni odbor na osnovu javnog konkursa, na period od četiri godine, uz mogućnost ponovnog imenovanja, u skladu sa Zakonom o javnim preduzećima, s tim da uslove konkursa odobrava osnivač, osim prvog imenovanja direktora.
- (3) Direktor može, u okviru svojih ovlaštenja, dati drugom licu pismenu punomoć za zastupanje Preduzeća, samo uz saglasnost Upravnog odbora.
- (4) Direktor može zaključivati ugovore u skladu sa Zakonom o javnim preduzećima i statutom Preduzeća.

- 
- (5) Prava, obaveze i odgovornosti direktora bliže se uređuju statutom Preduzeća, drugim općim aktima Preduzeća i ugovorom između Upravnog odbora i direktora.
- (6) Ovlaštenja direktora, kao ovlaštenog zastupnika Preduzeća, i ograničenja njegovih ovlaštenja upisuju se u sudski registar.

POGLAVLJE VIII. OBAVEZNE REZERVE, DOBIT I GUBICI

Član 20 (Obavezne rezerve)

- (1) Preduzeće je dužno formirati obavezne rezerve Preduzeća.
- (2) Obavezne rezerve Preduzeća formiraju se od dobiti koju je Preduzeće ostvarilo prema godišnjem finansijskom izvještaju Preduzeća.
- (3) Statutom Preduzeća se utvrđuju iznos i rokovi formiranja obaveznih rezervi.
- (4) Sredstva iz obaveznih rezervi koriste se za pokrivanje gubitaka Preduzeća, a za druge nepredviđene troškove obavezne rezerve mogu se koristiti samo uz saglasnost Upravnog odbora.

Član 21 (Dobit i gubici)

- (1) Neto dobit Preduzeća pripada Preduzeću.
- (2) O raspoređivanju neto dobiti Preduzeća u osnovna sredstva odlučuje Upravni odbor, uz saglasnost osnivača.
- (3) Gubitak koji ostvari Preduzeće pokriva se iz obaveznih rezervi Preduzeća, kao i na drugi način predviđen zakonom.
- (4) Neto dobit se ne može raspoređivati zaposlenim i članovima Upravnog odbora Preduzeća.

POGLAVLJE IX. FINANSIRANJE

Član 22 (Izvori i način finansiranja)

Preduzeće se finansira iz sljedećih izvora:

- a) budžeta Distrikta;
- b) prihoda od naknada, u skladu sa zakonom;
- c) prihoda od obavljanja djelatnosti Preduzeća;
- d) drugih zakonom dozvoljenih izvora.

Član 23 (Sredstva iz budžeta Distrikta)

Sredstva iz budžeta Distrikta se osiguravaju u skladu s godišnjim i trogodišnjim poslovnim planom Preduzeća.

POGLAVLJE X. OPĆI AKTI



Član 24 (Opći akti i tumačenje)

(1) Opći akti Preduzeća su:

- a) statut;
- b) poslovnik;
- c) pravilnik;
- d) odluke Upravnog odbora i direktora, kojim se na opći način uređuju pitanja ili odnosi u Preduzeću.

(2) Tumačenje općih akata daje organ koji je taj akt donio.

(3) Opći akti Preduzeća se objavljuju na način određen statutom Preduzeća.

Član 25 (Statut)

(1) Statut Preduzeća je osnovni opći akt Preduzeća.

(2) Akti niže pravne snage moraju biti usklađeni sa statutom.

(3) Statut donosi Upravni odbor Preduzeća, uz prethodno pribavljenu saglasnost osnivača.

POGLAVLJE XI. ODGOVORNOST ZA OBAVEZE PREDUZEĆA I OSTALA PRAVA I OBAVEZE

Član 26 (Odgovornost za obaveze Preduzeća)

(1) Preduzeće za svoje obaveze odgovara cjelokupnom svojom imovinom.

(2) Osnivač odgovara za obaveze Preduzeća do visine svog uloga.

Član 27 (Prava i obaveze Preduzeća)

(1) Preduzeće ima pravo da u pravnom prometu zaključuje ugovore i vrši druge poslove i radnje u okviru pravne sposobnosti Preduzeća.

(2) U pravnom prometu Preduzeće je obavezno pridržavati se zakona i drugih propisa.

Član 28 (Poslovne knjige i računovodstveni izvještaji)

(1) Preduzeće je dužno imati i voditi poslovne knjige i pripremati računovodstvene izvještaje u skladu sa zakonom i međunarodnim računovodstvenim i revizijskim standardima.

(2) Poslovne knjige Preduzeća su predmet eksterne revizije.



Član 29 (Poslovni i finansijski planovi)

- (1) Preduzeće usklađuje svoju razvojnu i poslovnu politiku, kao i finansijske planove, s izvorima finansiranja Preduzeća, u saradnji s Vladom Brčko distrikta Bosne i Hercegovine i s nadležnim odjeljenjima.
- (2) Učestvovanje Preduzeća u pripremi budžeta i realizaciji projekata koji se finansiraju iz kapitalnog budžeta Distrikta uređuje se posebnim aktom gradonačelnika Distrikta.

Član 30 (Pravna sposobnost)

Preduzeće stiče svojstvo pravnog lica upisom osnivanja Preduzeća u sudski registar.

Član 31 (Javnost rada)

- (1) Rad Preduzeća je javan.
- (2) Preduzeće podnosi gradonačelniku i Skupštini Brčko distrikta BiH izvještaj o radu najmanje jednom godišnje.

DIO TREĆI – PRELAZNE I ZAVRŠNE ODREDBE

Član 32 (Donošenje općih akata)

Opće akte Preduzeća donosi nadležni organ Preduzeća u roku od 90 dana od upisa osnivanja Preduzeća u sudski registar, ako drugačije nije propisano zakonom ili ovom odlukom.

Član 33 (Izmjene osnivačkog akta)

Izmjene i dopune ove odluke vrše se na način i u postupku koji je propisan za njeno donošenje.

Član 34 (Vršilac dužnosti direktora)

Skupština imenuje vršioca dužnosti direktora, koji je dužan provesti postupak upisa osnivanja preduzeća u sudski registar i druge poslove i dužnosti direktora utvrđene odlukom o imenovanju vršioca dužnosti.

Član 35 (Primjena propisa)

Na pitanja koja nisu uređena ovom odlukom, a koja proisteknu iz njenog provođenja, primjenjuju se odgovarajuće odredbe zakona i propisa kojima se uređuje materija u vezi s javnim putevima, javnim preduzećima, javnim nabavkama, sigurnošću saobraćaja, kao i odredbama drugih zakona i propisa koji uređuju ta pitanja.

**Član 36
(Prelazni period)**

Pododjeljenje za puteve i parkove će obavljati sve poslove iz svoje nadležnosti do početka rada Preduzeća.



**Član 37
(Stupanje na snagu)**

Ova odluka stupa na snagu prvog narednog dana od dana objavljivanja u Službenom glasniku Brčko distrikta BiH.

Broj: 01-02-613/12
Brčko, 8. 8. 2012. godine

DOPREDSJEDNIK
SKUPŠTINE BRČKO DISTRIKTA BiH


Ivan Krndelj, dipl. oec.

Dostavljeno:

1. Predsjedniku
2. Dopredsjedniku
3. Gradonačelniku
4. Odjeljenju za javne poslove (2x)
5. Sektoru za koordinaciju politika i opće poslove
- Odsjeku za opće poslove
6. Arhivi